

四庫全書

集部

欽定四庫全書

集部

西河集卷二百六十一至

詳校官編修臣曹城

助教臣常循覆勘

總校官庶吉士臣倉聖脉

校對官編修臣沈清藻

謄錄監生臣劉書

欽定四庫全書

西河集卷一百六十一

翰林院檢討毛奇齡撰

七言古詩

泛舟過秦園留贈秦翰林松齡有作

芙蓉湖上曉雲生
畫舫還為湖上行
碧草千絲含日映
紅粧幾處照波明
平橋入路開朱榭
曲澗濃濃林裏瀉
泰伯城隨南泚迴
春申祠在東峰下
祠前流水自年年

宛轉滌洄最可憐不從梁氏花漢度只在秦家桂樹邊
秦家桂樹生烏子文石為池蕩秋水別巷應通鮮玉坊
前闕並築燒金壘烏桺紫木夾層樓大府錢堆馬埒溝
北谷繩床春自偃西園翠蓋夜為遊暗通瓠甕銜環轉
細激連珠波面捲出地疑分太液來去天不道承明遠
滄州自古惜沉淪花底偏逢翰苑人潘岳娛親推綠輦
謝公攜妓坐紅茵風流盡日開三徑自笑多年隱名姓
門投張儉已還鄉廡下梁鴻豈亡命一自浮家願屢違

吳中築室故人稀
君家尚有清冷水
何日重來一浣衣
鴛湖黃子錫自號麗農
住苔南癸亭種瓜自給

予在淮西道遙題此詩

黃公最愛菰城山
攜家避地嘗往還
自辭楚相不得意
荷鍾欲老青苔間
平田十畝啓幽壑
招客還留癸亭鶴
春半閒炊松飯香
晝長臥看瓜花落
烏皮小几拂紫絲
興來每欲圖東菑
嚴關醉臥淮西客
為汝題詩思復思
息縣阻雪同諸公集
何景韓梅花書院有作

我遊淮西三遇雪買酒一醉懸瓠池
今來雨雪阻新息出門泥濘無馬騎
高陽好友澆清醕爭道梅花發前渚
繞屋頻燒五木盤捲簾邀看三花雨
辛蒸蕙錯羅苾芬豕鬻蚍醢青羊臄
興來高詠和集霰酒酣噓氣為同雲
周燔獸炭澆酒熱重見寒空攪冰冽
幾斛明珠撒瓦檐萬條翦毳拋銀埒
相逢同是作賦才夜深秉燭還登臺
洛陽縣令煩趨走莫遣明朝掃雪來

射獵歌為金公子敬敷作

汝南公子好射生天寒射獵城東行申陽一關跨九塞
招來游俠俱有名平原積雪滿叢薄上蔡新羅縱搜索
黃帝祠前雉漸肥白牙岡上桑初落雙鞬壓臂掣皂雕
桃花叱撥嘶來嬌銀翎割就穿珠簾碧血凝將淬寶刀
鞭梢倒插如蘆管新織罽衣偏後短腰帶橫垂海貝寒
指環細夾霜貂煖虛彎明月過雁驚忽然箭落秋雲平
青天毛血灑如雨韓盧宋鵠空營營枯蓬蕪肉當寒燒
地列沙冰阻長道望得黃熊驅不前擲却瑠弓自調笑

斜陽入地馬若飛懸禽帶獸盈金鞮歸來但索駝酥飲
醉臥花前金地衣

金公子射虎詞

蔡州城東夜飛雪公子朝裝絡寒臙錦柙抽將練影長
角弓開處霜膠折平臯木落狐兔稀風吹淺草蒼鷹飛
近前雪窖有猛虎暮寒攬雀嘗苦饑中原神物應樞運
樵採年年不相問豈是將軍在北平只因太守為南郡
圍場突出公子豪從來豢虎將終驕同行雄帥伏強弩

獨遣健兒燔枳毛般般三獸起鬪格吼入深林蟄雷坼
觀時朱亥尚倉皇射得張昭動容色長楊羽獵會有時
汝南公子真雄姿請君暫息長鯨飲聽我為歌射虎詞

送史尚轍進士過夏口兼寄丘學士

時學士為武昌別駕

晨裝欲動海鷄鳴日出河橋相送行繫馬未辭王粲宅
前旌先指武昌城河橋日出輕攜手為食嘉魚過夏口
去雀秋翻北渚雲啼烏夜宿西門柳故人遊宦滯江鄉
十載還辭白玉堂共道秘書懷謝監翻令別駕得王祥

從君昔在枚臯里，憐我貧依漂母傍。飲酒不嫌車下醉，
逃名時就壁中藏。漂流歲月同虛棄，惻惻相思成往事。
况汝春官舊主司，杏花開後慈恩寺。
史禮闈出學士門下官齋對
酒洗征鞍，醉後應看江上山。若問行來何所見，但言遊
子不曾還。

丹陽城下作簡郡司馬

丹陽郡裏秋楊綠，不見當時舊劉穆。鐵甕徒懸鶴鵲棲，
金盤不貯檳榔肉。岩堯雙闕古郡臺，丹陽司馬今奇才。

方輿偶屈陳蕃坐錦幘真看謝奕來高牙傍海發葭鼓
萬疊寒濤散樓艣典兵自惜重南徐雄鎮只今推北府
江東遊子歸較遲登樓賦罷將從誰重來丁卯橋邊路
欲把垂楊幾度思

過江南奉謁周侍郎值其行部留詩代訊

我懷周侍郎忼慨不得見手把三年袖裏書漫字紛紛
落如霰蘆碕夜走江路長東浮淮浦西潯陽侍郎久作
南藩使每過江南願投刺踟躇側促終不前將投叩楚

行蠻天姜生呼我汝南去路出龍江幾回住斯時正好
謁侍郎又當行部留維揚我昨渡江來巨浪高于山天
風萬里吹不定烏雀飛飛空自還前灘乍愕擁波白獨
駕孤航片帆窄海豕江魚轉鬪爭篙工柁女愁顏色昔
讀侍郎文怪其有如此浩蕩奔騰勢無止直下如傾七
澤濤橫來不斷三江水孤航相向宛如睹恍與高齋覲
晨暮江邊况有蔣侯家小妹青溪舊曾顧十年出處同
嶮巖懷人何必吹參差倘尋結襪留歡處只在乘船破

浪時

楊將軍美人試馬請賦

將軍航頭載美人春行晚泊橫江濱斜陽墮地草場濶
酒酣欲試紅麒麟美人常服雙袴褶青錦鴉欄紫絲結
蟬鬢當風捲似雲馬毛散汗吹如血金錢壓口玉袜膚
馬前細立秦羅敷見人羞上還將墮壯士驚前不敢扶
調鞍整轡坐不定忽見桃花滿春徑將軍似妬九華韞
在傍休視雙金鐙明霞片片爭繞林紅游落處桃花深

金匱要略卷之三
卷一百六十一
回頭失却真珠櫟春草蒼茫何處尋

飲巴亭放歌并謝朱三驛元馮大之京王十文

鼎王二漢

泥泥草頭露不浥春桑枝傷禽驚離弦不解彈縵絲可
憐數載滯江滸暫得相依駱明府集木難教逐鳥烏當
筵詎敢題鸚鵡盤中食梅長苦酸冰絲還結締袍寒誰
攜美酒召我飲居然高會巴亭山金盤玉笋勝三雅兩
兩鴉鬟似窈窕小字曾為明府知清歌不在王郎下行

觴襟坐飲未闌玉釵錯掛微臣冠流離之子久失意那
復斗酒能為歡從來聽樂惡哀嘆我未聞歌已腸斷嘈
嘈絲竹空滿前誰使飛鴉渡河漢三條裾子染竹黃一
雙素手如秋霜擎將碧玉欄邊酒傾出真珠甕裏漿傾
漿重起歌結襪渺渺愁心過綠髮座中可惜是毛甡莫
遣巴亭待新月

巴山酒壚送王十孝廉北行

巴山秋市懸青帘市中却逢王孝廉當壚十五洗梧杓

眉間撲粉如紅鹽楓林百尺日初照惱煞王郎尚年少
五上公車十二年碧髮重遮綠羅帽巴山城下秋水清
壚頭醉送王郎行明年我亦來燕市看汝春風馬上生

將出巴城道寄徐十五緘

春風吹葛條蕨蔓被溪曲巴城舊酒壚又見雙幔綠酒
壚雙幔綠如草將去巴山出東道記得來時秋雨零我
投簫寺徐生行秋雨淹寺門徐生行且住惜也三日留
仍向雨中去雨中一去秋水寒聞君久滯豐城間至今

草青及春暮不識君今又何處十年奔走不得志道路
相逢偶然事南北東西各自馳誰復風塵訊騏驥我數
游南昌潦倒無一詞羨君慷慨歷落千回思去年雨中
讀君句恍捲長河向天注一任秋霖汨馬牛半入寒空
散烟霧登臨若此真可惜何處天涯少蹤跡但使能留
高士亭無須更作名王客巴城二月春草薰城頭黃鳥
啼紛紛我行記得君行日欲出巴城轉憶君

春夜飲就亭花下見施二公子彥慤當筵賦詩

有贈

神龍墮地便生角鳳雛出林成羽毛不見宣城施彥慤
少年特達傾人豪春花初開啓官舍豪客當杯酒如瀉
錦袍綠髮衣帶紅搖筆熒熒燭光下燭光映筆筆花落
展卷生風動油幕滿座咨嗟倒白波一庭風雨翻紅藥
高陽舊里擅才子元季雙慈近誰似毛姓夙歲曾渡淮
但見楊家一童子西河楊童子歌見前宣城文章將起裛庭前卓
犖真龍媒毛姓自傷徒老大見此不覺心為摧強顏捉

筆擬酬和舉手落蓋空徘徊看花愁見新花開

紫芝山歌

有序

施公分司築亭于臨江城南之瑞筠山忽紫芝數百
本繞亭叢生南昌李宗伯碑為之記且更名此山為
紫芝山而標諸亭越數年毛姓登亭而歌焉

毛姓走天涯歲歲厭春草曾採三花不得還空臥嵩陽
歲將老踟躕地上苦未閒西游重到匡廬間湖西丈人
倚青嶂宛若姑射難躋攀丈人有佳興云在城南山城

南山頭有亭子紫蓋團團碧雲裏背阜橫當古郡臺前
林直傍清江水丈人築亭年復年當時異事今還傳紫
芝本靈草斯地瘠難種亭前忽見湧銀甕彷彿丹霄間
九彩睹翔鳳又如珠焰發丹穴芝草芝花滿丘垤採之
亦不窮斲之亦不竭如盤如椀復如蓋輪囷離奇壓車
載悔不當時負耒來食以當糧紉當帶以此呼此山亦
名為紫芝靈蹟嘉名又一時未須四皓返商洛先看三
秀生銅池迄今採芝已不早尚見山頭此亭好毛姓慨

然登此亭幾度亭前聽啼鳥清江初漲江水長山風細
拂林花香游絲飛絮裊衣帶遙天望眼空茫茫我將舍
之去念此芝草芳紫芝之草有時歇芝山勝事無時忘
君不見紫芝山頭勒碑處有客哀歌不能去

陳柱國將軍期宿鎮山遂汎舟集南塘同張杉

平津李章姜垓商命說徵說兄弟作

天星出地馬出關將軍夜宿城南山深林列火忽如晝
與我高會叢祠間平明鼓吹結珠勒毳幄重重映波白

合艦同尋賀監湖毛生真作平原客湖亭日上林影疎
金刀自繪秋湖魚西園才子分彤管南國佳人披錦裾
平山十里勝金埒頻挽睢陽弄鵲血獸炭燒成越嶠雲
駝酥點作燕山雪歡娛短景苦難駐秉燭還題越臺樹
皎鏡東飛錦纜開將軍夜唱迴舟句
時迴舟聯句
陳為首唱十年
長避追吏馳還鄉尚咏平林詩滕公豪氣真無敵羞煞
山陽衣褐兒

西江送春曲

送春歸春歸在何處江草茫茫江水長不識春陽去時
路楊花墮地吹復飛草間蝴蝶沾人衣游絲百丈綰欲
斷平沙白日空遲遲江邊酒壚十五女不解春歸客心
苦紅帘日落照眼明猶唱陽春當金縷陽春唱罷思復
思可憐又是春歸時

漫歸復行書孔雀行關樓謝趙明府

趙棠溪先生時為蕭

宰

孔雀披金花南飛畏剗尾白壁光芒受世疑子長縲絏

非其罪東門拔劍不顧歸十年還視桁邊衣廳花結網
無鶯度戶草張置有隼飛張置結網遮無路欲渡蘆碕
行又暮趙相真看解印來外黃重見操兵去南飛孔雀
北度鴻將垂巨翼乘長風臨行不辨銜珠處啄盡關前
花樹紅

沈華席上同張杉王鎬錢霍王元愷平津祝宏
坊并憶沈九秘書時九月八日

吳興沈華宴賓客毛姓晝逐朱家來相逢衣褐把美酒

當筵意氣為之開連年變姓滯江表衣上風沙不堪掃
高陽滿座相顧殊只有沈郎顏色好悄頭碧髮裏綠羅
銅槃灑激傾金波阿兄簪筆掌文史方蓄新菱染麻紙
翱翔入作親近臣家留賢弟能娛賓紫薇院裏張紅幔
白玉堂前鋪錦茵憶昔山陽度廣柳曾別難兄醜杯酒
今來江上覓蘆碕尚藉平原匿好友平原好友真足誇
姜肱繡被平當家

時予留姜祠
音平載問宅

玉椀甫看分碧藕金錢

又見拆黃花黃花滿地中心苦忽集華堂思如雨明朝

倘約採茱萸莫負山陰柳家女

予屢歸不得釋冗屢過湖西施公苦相留日留
日刻留刻適就亭鸚鵡三脫三復返予刺傷
于心因為賦鸚鵡還詞

鸚鵡還鸚鵡還相思只在隴西山隴西萬里思歸去休
挂人間畫欄柱畫欄雙柱玉籠垂金鎖連環控紫綏欄
邊言語應憐汝心裏分明却訴誰却訴誰應憐汝早知
苦分明何如不言語潛潛啄我紫絲絲密密捐予金鎖

條潛潛密密終教去金鑲紅絳何用住且避玉楹林且
上石榴樹初疑小樹上無力既道長林遷不得別苑猶
牽紅兔羅遙天只墮蒼鵬翼蒼鵬紅兔走復飛躊躇去
此將安依他鄉好主應難遇故國多艱那得歸一去復
一還主人相對起歡顏相思仍向深林避再去再還非
主意主人破柱且開籠不道三回仍未逝仍未逝主且
憂尋殺欄邊紅石榴石榴牆外行難測手執紅絳淚沾
臆絳亦漸就促鑲亦漸就短一絳三續尚堪披萬水千

山何處返鸚鵡還鸚鵡還願君仍住石榴間石榴啄罷
傷紅背願君仍住紅絳裏紅絳臨繫翠衿住主人淚落
不能顧

姜垚招登香鑪峰絕頂同姜十七廷梧商二徵

說

秋山翠律海日紅浮暉倒映金芙蓉蒼崖負杖招羽客
攜我直上香鑪峰楓林黃葉下幽壑杖底風吹草衣薄
石屋高看洞鳥翻橫梁斜度山花落秋空望海海色飛

赤城萬里烟霏霏越王臺上青烽起夏后祠前白雁稀
玉函金簡探難得况蹈嶮嶽未曾息北谷空標承露臺
南還竟負凌風翼蒼崖四顧意氣開吹笙跨鶴真仙才

何年乞汝盈箱藥共俟安期海上來

在號蒼崖子
時修玄學

霖臣招予汎舟三日夜

商霖好探奇攜我汎青翰日日南湖汗漫游恍若乘槎
度河漢山橋畫柱溪洞門夏王臺殿西施村碧江開錦
簾綠草藉金尊檣鈴榜吹襍柁鼓朝日西飛暮來雨五

木燒殘江鶴飛千花開處山雞舞君家兄弟真絕倫攜
予一避桃源春山中七日家應改幾欲還家愁殺人

聽流鶯歌

聽流鶯百轉在春城宛如舊苑花枝裏曙色將開弄曉
晴此時玉櫛猶未啟此日金屏夜如水夢中隱隱聽絲
蠻起見牆東映日斑牆東映日花枝煖睨睨絲蠻啼漸
緩乍穿錦葉覽停留移到金牕更宛轉可憐宛轉最多
情可惜間闌寫不成秦女簫中三四弄吳娘曲裏百千

聲今來百草翻紅色今日聽鶯度錦陌誰解參差遠趨
人自傷漂蕩還為客參差漂蕩逐流鶯百變風前斷續
生金刀細剪流鶯語依徙春城不忍聽

和張夫人拜新月詩

拜新月拜月出簾櫳天際分蛾碧花稍觸甲紅拜新月
拜月粧臺側覆斗鉤自懸斜梳墮無力拜新月拜月暗
傷悲記得少年時南園同伴侶裙帶一垂垂今看井桐
及秋暮燕子西飛鵲東去夜靜花堦綠蘚間羞向低低

影邊顧冰輪半掩當復明
娉娉桂樹暗中生那能拜得
新生免長與金烏作隊行

一本題下有懷友作末那能
二句作如何月下紅闈嬌歲

歲長留
木葉城

西河集卷一百六十一

欽定四庫全書

西河集卷一百六十二

翰林院檢討毛奇齡撰

七言古詩八

杜陵蔣楛游淮曾讀予舊詩有感枉過不值留
句見寄予適滯海濱率賦酬意

憶昔避地淮陰城吹簫乞食更姓名山陽縣令爭認得
呼我車載還都亭爾時秋風度淮水高會名園在河嘴

入夜鐘鏞動地來當筵詞賦驚人起從茲日飲淮市傍
酒徒到處爭相藏元王廟後杏花閣駙馬巷邊薜荔牆
人生聚散等朝露二十年來彈指過醉裏難忘鼓瑟時
花開不記留題處杜陵高士有蔣生先後曾同淮浦行
見予舊事每興感貽來新句何多情嚴冬結駟過江縣
柳下尋予不曾見雙扉久閉綠羅軒千里尚投青玉案
但言時事多變遷黃公壚下尤堪憐稽劉已謝竹林去
臺館半傾河水邊故人存沒久心惻况讀君文泪霑臆

夜月彈為海外琴寒風吹送山陽笛我今將欲尋杜陵
東西南北隨元御他時若溯長淮路何處還攀桂樹生

中秋山寺作

清風吹林當素秋碧空灑激金波流可憐二七又三五
獨坐繩牀月當戶初籠輕霧幃冰紈旋破濃雲出翠巒
花壇斜倚青銅鏡松葉高穿白玉盤生平待月啓華帳
稍掩浮霾便惆悵林表今來閉寺看樓頭誰復開簾望
去年雪浦弄清暉前歲湓城烏鵲飛此日山中無可翫

夜深霜雪滿秋衣

天馬行送崇仁吳孝廉公車

吳生本公孫大道騁騏驥云是天閑舊賜駒我友孫陽
識名字金絲羈子玉花勒將上燕臺振高策大道相逢
秋漸過正好長安看春色君家舊有黃閣臣

吳為崇仁
相公孫

閣前絡得生麒麟從來開閣歌天馬原屬公孫第一人
奉贈顧將軍七十并呈嗣君澄

吾郡顧元嘆少曾封遂鄉讀書擊劍跨鞍馬橫行絕塞

驅賢王歸來直棄雲中守右臂茸茸生細柳好學嘗經
蔡伯稱貧交但飲孫權酒藜牀高臥七十年過江子弟
皆名賢庭前多少烏衣客最愛江東顧彥先

守歲姜掌誅宅值太翁虞曹公上日初度酒酣
有感因即事成句并呈掌誅君書次幃末

連歲浮西江三朔剪華勝曾飲巴山山寺中夜走郎官
集車乘今來守歲依誅公猶藏複壁東垣東堂前老都
諫愛我如孫嵩輝輝夜燎徹銀雷坐對銅槃儼晴晝莫

道椒花媚少年須知栢子添長壽雄雞叫罷閭闔開
招搖初轉蒼龍回統如嚴城打五鼓諫公衣錦三進舞須
史魚鑰啓重闔萬里扶桑綴遙雪云是三朝賜勝時正
逢七十懸弧節當年都諫趨紫宸仗前冠劔稱親臣八
風吹入金門曉萬壽呼來玉殿春忻承假沐留觀省通
德門高愛光景上日陳筵紫氣生元辰進誥黃絲迥諫
公披賜袍銀青襍緋紫丈人本冬卿珮履紛若水諫公
滕立親捧觴鳴珂列戟盈華堂越中四姓攀麟紱浙上

諸侯侍雁行相國持漿脩拜母縣官負弩重還鄉宛如
張尉迎京邸絕勝虞譚賀武昌慚予流浪頗畏約枉廁
親朋把杯勺戢鳳難傳祖德明椎牛不逮親存樂酒酣
浩歎溯所始七葉貂璫代相啓太僕捐民賦光祿匡儲
君尚書甘去職要典持微文始知申蟠本非罔太丘何
必名鉤黨司隸忠臣應代興虞曹竟嗣春垣長春垣祿
養世所稀只憐座客言詞微願持三朔銀幡勝長傍千

秋戲綵衣

將遠行曲

將遠行乃在西南阿楚間
昆陽池外千重水
闌索樓前萬仞山
我將為沈犁之鬼
蒲刺之蠻蠻中轉深曲
乃與鄉井辭
天寒日暮行安之
仲尼居東海莊躋留西夷
將遠行無窮期

王元愷將之巴山有贈

寒不披豫章絹
饑不食萊蕪魚
韓康范史日不足
誰能刺促分其餘
巴山令君本廉吏
自艾青葛作賓
餼敝井

難浮花下樽空亭長擁車前簞故人相誠勿復前王生
欲去仍流連王生抱意氣食力苦耕稼長貧念同袍千
里將命駕可憐命駕不得達斗盎無粢衣無褐集蓼終
愁楚雀迷橫江誰把枯魚沫桃花乍發柳乍青河橋一
步三留行毛姓進前願致語座客紛紛醉起舞君不見
君家阿齡貧且饑烏程陶令爭求知滿船白粳收不得
願索窮交鎮西食又不見毛姓乞米走江汜賣卜王成
暗相倚豈少荆南幕下詩但飲巴山署中水解襦不敢

衣顧郎易衣并食翻尋常生人苦饑值春節黃花白絮
真空倉君不見毛姓南避入蠻部萬里滇雲黯如霧金
馬關前無故人竟逐王生過江去

訪劉息縣并讀周櫟園侍郎所詒文序因為書
贈

劉郎本是神仙姿手揮五色春桑絲中都偶爾作試吏
望之不見長相思昔年曾逐湖西使一訪廬陵老從事
命駕空隨曲巷車留題無復高門字躊躇東顧還蔣山

暫依櫟下官臺間櫟翁老人出君句為君諷詠開心顏
秋鴻飛飛信羽翼重向嵩陽看山色桓良未獲遇浮丘
賈父何期在新息長途宛轉思一顧不道寒風薄冬暮
日落天低頽上城朝來雪滿淮西路夫君獻賦標石渠
尋常痛飲留柴車吏歸自戀空倉雀客到還烹掛壁魚
十年相憶苦紆結相見忻逢歲寒節息子墟邊嘆轉蓬
白公城畔猶飛雪高談今古誇典墳篋中所載方紛紜
君能不忘湖西客且與同觀櫟下文

過息夫人粧樓遺址有感

荆門不種章華樹
此地還留洗粧處
紅粉銷殘澗道花
翠蛾飛作山城絮
澗邊白日自悠悠
城畔粧臺秋復秋
回首故園長不語
鎮教淮水向東流

一抄作淮流千里
一望長誰家高閣

映斜陽故園相憶都無
語回首萋萋空斷腸

遊濮公山作

毛姓居息不得意
搢願日望城南山
東甌夏君今贊府
策馬邀我遊其間
出城風日稍暄霽
朔風吹面面不寒

淮流本出自桐栢到此漸覺橫來寬前呼亭長先渡馬
幾曲淮流下如瀉渡口方看載一航道傍爭欲開三雅
須臾繫馬入樞林濮公仙洞難追尋幽崑尚自留丹竈
過磻誰能採碧苓相隨野鹿度空谷便啓清樽坐蘿屋
紅樹彫時未放花翠屏高處曾懸瀑重披荒徑啓前路
策馬直臨峯頂住長淮一帶渺如環萬里蒼茫盡烟霧
從來黃白不易得梅尉當前總仙客况有張王諸孝廉
曾經出入蓬瀛宅長林落日客未歸平田夜火光霏霏

嚴城欲下歲徒鑰尚見山前烏鵲飛

飲郭將軍竹下

萬竿修竹臨清流竹中留客郭細侯短簫橫笛向風發
居然身在蓬瀛洲行厨斫桂煮芍藥玉甕桃花泛清酪
近郭天低散馬牛空亭雨過飛烏鵲酒酣倒載折角巾
繡衣卸出紅麒麟將軍本是蒼山客不數悠悠世上人

定情歌飲秦二保寅醉後作

數歲遊吳闕不逢臯伯通長攜杵臼少相識獨行畏約

何終窮更夜起自擊筑暫就梁溪主人宿深念秦嘉
是麗才久知王氏無癡叔飄飄挾刺隨襍衛風流學士
相逢迎未從隘巷窺孺子便向東家訪步兵東家桂樹
生前路秦氏從來桂中住朝起金丸寫畫欄夜來烏子
栖庭樹庭前列烏羅酒漿酒徒相顧稱高陽羈人辛苦
易為醉午日欄邊只將睡我昔歸明湖誦君秋帆辭愛
君不得見一日千回思思君見君恨不早悔見秋帆去

縹緲同時嚴忌最高才况復君家仲容好

嚴蓀友與令
侄留仙同為

詞
美人何在愁復愁芙蓉開落經三秋今來但泝春申
浦何意還登秦氏樓請觀杵與臼與君指皎日在上羅
廣衾在下蔽弱席與君戴笠還下車相思莫惜加餐書
倘愁越國無歸雁此地吳王善鱸魚

汝南郡亭飲次贈譚八吉緯

汝南城上曉鴉啼王粲宅傍春燕飛故人千里一相見
越布單衣白如練春陽艷艷汝水邊桃花樹樹郡亭前
清明初看鞦韆戲上已還吟芍藥篇自憐蕩子多離別

愛汝中原遍車轍彩筆能圖五嶽遊金丹自受三茅訣
伊昔相逢淮水頭酒酣同過謝家樓今來重憶當年事
把手金樽泪欲流

廣文先生歌贈張學博

廣文先生讀尚書客來有鳥嘗銜魚花間促坐絳帳舒
不須歸去河汾廬當時獻賦誇子虛十年勾卒將公車
我今相遇沈子墟春風冉冉吹衣裾莫嫌高論與衆殊
此間已是張融居

將過松江先寄朱大用礪使君

探書出林屋放舟遊吳淞欲觀海上袁公壘不問雲間
陸士龍雲間勝地推吳下有友驅車最瀟灑劉毅嘗為
郡股肱謝生今作軍司馬風流司馬是何人共識當年
侍從臣丹鳳樓邊攜綵筆紫薇花下展紅輪紅輪綵筆
紛相映侍女留題請名姓起草時聞長樂鐘整衣不避
昭陽鏡可憐厭處承明久解玉坊南私縱酒兩省通傳
翰苑書一麾竟佐江城守江城千里蔽東吳黃綬金章

一大夫嘯咏全為方外客從容分得郡中符果然祖父

為三事方信男兒長五湖

使君為朱少師公冢孫大金吾子故云

君到只

如棲枳鳳我來方欲覓尊鱸已辭梁苑新車騎况遇高
陽舊酒徒高陽夙昔輕相顧梁苑從教騁辭賦片輿何
必假陳蕃八俊由來重朱寓陳蕃無事朱寓閒題詩應
滿干將山秋高正值鱸魚美我欲維舟三泖間

湖上贈何生倬炎

何伯興季子也

秋湖十里生芙蓉湖邊却逢何敬容緋袍相對儼翔鳳

綵筆欲落驚游龍廬江自昔嬪才子前有司空後侍史
洛下清談宛舊時元嘉樂府傳新體秋花灼灼秋水清
道傍又見驂騑鳴荀羊本是長瑜友美爾趨庭有令名

送李生

并序

乃歲屆祝淵時當顓冥甬東李生此源稅駕于都督
李公之舊第維時白日窮次縞雪凝壁長松倚崑其
信芳寒梅蔽扉而釋萼仝人咸集各贈以詩志永懷
也原夫淇泉木李本貯瑤情澧上香蘭互申縞結故

仲宣贈子篤于飛鸞正叔指河陽于逸驥苟懷悃悞
豈乏呻吟李生抱苦心之行仝儕起定情之什以義
而言固其宜矣乃戴逵入剡未聞買山阮籍當車於
馬就路陳元龍淮海之士梁伯鸞傭賃為生將騎驢
出門惟其所之牽舟上岸亦無可住王孫遊遠道睠
春草之萋萋彼美在何方誦山榛而掩涕是伯陽適
西戎而留字文羆遷斥丘以受言凡屬親串之所經
誰勿咨嗟其善誦况李生沉淪之士也家本閩閩世

濟開府棄朱門而勿盼甘白晝以長征胸羅星漢每
推烏績之紬節撫雄雌潛識秭漳之擾于是正棊旋
拭辨才子之蟻趨發策兆機啓靈均之浩蕩定箕張
而斗揭任蚩伏與螫伸則是帝女睽蜀都而抱石大
夫拜楚人以獵冠江南投老應賦逢君稷下談天喜
稱贅壻者也夫心企東山意傷南浦蘭亭原倡既擅
糠粃海谷遙吟當來璣璧維茲軼士預為風漂伯叔
之詞既屬同人應續雨雪英瑤之句

先生本是青丘子直走塵埃過都市脫履朝看圮上星
乘槎暮宿天河水梅花初發雪滿襟相逢醉臥東城陰
天涯淪落知無定北斗南箕何處尋

淮康行贈別

元龍百尺樓頭客又向淮康奏嘉績監郡能分五虎符
題輿不假雙熊軾九重丹詔下青霄十月黃鸝度翠條
朝日褰帷鹽澤雨春風送艦射陽潮開樽暫飲如淮酒
漸入天街見星斗若問人懷峴首棠但看鴉栖掖門柳

潼川歌

有序

丹陽賀先生膺選崇禎十六年受資陽縣令夫人請
從叱馭而行行李自成破成都資陽不守先生及夫人
慷慨就刃自成怪之命釋以俟屢脅之順畢不能屈
繫之別營猶欲處焉越二年十月賊敗於南鄭懼中
有應乃指而嘆曰留此輩為梗矣殺之同行十七口
並日死于潼川州越十二年先生二子雲會雲舉俟
西道通尋之不得有彭君退庵備述其事復詢之資

人蔡文學語與相合號啣而歸雲會為司馬與予善
予乃作潼川歌

鹽亭何高高梓水何連連四座且莫喧聽我歌潼川潼
川州南射洪渡天柱雲封七盤路不見潼川繞地來但
見南津上天去南津令君負奇節夜泛桃花暗流血桃
花江上草初青一夜寒風白如雪相傳此地殲令君招
魂萬里呼南雲睢陽齒落白崖裂蒼弘血墮高粱焚令
君家世本吳楚北固山頭射猛虎興酣聚米劃地殊愁

來投筆長心苦縣官續食計車發便請長纓繫南越嚴
助三年厭舊廬龐公百里懷新割驚聞盜賊出巴下玉
壘珠江廢耕稼白帝終成躍馬王紅巾時起鳴狐詐慨
然請行一星入夢中曾見三刀集崎嶇九坂誰肯前忼
慨王尊赴何急閨中有婦孟氏賢從征作賦同車駟解
綿繫樹苦食芋封魚滌釜長生蠹倉皇烽火接城野急
繕亭隍料牛馬轉戰空聞笛裏哀升陴誰是搴旗者天
心不解遂人志人事良難勝天意縱教南八是男兒難

免西川盡捐棄丈夫死官久不屈舂磨若邊自強立完
城蔓子刎已遲斷頭嚴將生難執霜刀環視驚罕希誘
以好爵啖以糜赤繩馬頭繫有待無如南鄭傷還歸天
陰雨凍地冰裂乙酉之冬月初缺令君罵賊身死亡正
在潼川此時節君不見令君同死十七口全行死盡皆
無有彭子退庵眼見知長望桃花酌春酒又不見令君
二子遠相失十六年來尚尋入難持齒髮向天涯疾走
潼川自悲泣潼川潼川西近秦桃花水落青春新我今

歌罷潼川曲
還想潼川赴死人

西河集卷一百六十二

欽定四庫全書

西河集卷一百六十三

翰林院檢討毛奇齡撰

七言古詩

九

寒食直史館奉和同年李漁村太史兼呈同館

諸公

春城日出鷓尾紅
下馬入直東華東
忽言今日是寒食
愁入萬條新柳中
陽春初過一百六
日趁車塵苦追逐

大道時聽賣野錫宮門無復傳官燭溝頭水漲花尚稀
早寒猶著春前衣庭槐幾見火新改故國六年人未歸

同儕相顧起愾忼此地前經設東廠

今史館即前朝東廠地李太史是日

有詩故云斷烟祇為惜亡臣殺竹何堪謝鉤黨鄉園日夕風

雨餘沿門幾樹春桐花明朝畫舫門邊住好入春山焙
早茶

送同年尤侗南歸

東堂著作誰擅聲一時並讓尤先生羣公隔舍爭問字

天子殿前長喚名今來慷慨賦歸去家在東湖最深處
堂上重裁薜荔衣門前自種垂楊樹吳中築室志未成
集賢坊下還留行堪憐五載追隨意頃有千秋萬古情

予向渡湖時更名王士方宿竺蘭聖宣二上人

房去今二十年後予過上海聖宣貽書兼索

書舊日所題詩句感生於心賦此志謝并呈

蘭公代訊

昔有王士方曾經擾精舍雨後潛行菰葉中病來借宿

蓮花下其時高座有聖宣上人佳句繇來傳烹葵時餉
白雲塢拂軫夜彈流水篇秋風一別過湖去從此天涯
隅晨暮歲月難教古寺留夢魂猶向長橋度蘭公垂老
能著書不知舊客非文殊毛姓廿載尚淪落時代士方
傳起居只今海上望雲日欲訪巢雲舊禪室常恐紅顏
今昔殊對面相看總相失蒙君貽我綠綺琴并邀一寫
蘆中吟愁心欲記當時事幾度含毫泪滿襟

宣德窰青花脂粉箱歌為萊陽姜仲子賦

君不見宣皇宮中脂粉箱青花素瓷出上方陶模范埴
好形像燒胚燿膊非尋常曼身穴腹判兩截一道坎中
周四旁融脂淪粉恐膠結洄漩複壁流溫湯宛若麗華
鬪粧罷宮溝淺膩縈苑牆何年此物坐棄擲竟置姜郎
硯塘側隔盜微聞金粉香開奩尚帶臙脂色摩抄日劇
但把弄未審甄人定何用賈人欲認不辨名虛女相看
宛如夢連昌宮監老不堪落花時節來江南見此忽爾
驚嘆息云是先朝舊承值曾賜昭陽繫臂紅玉函脂粉

在其中盤間花貯甘泉露鏡裏衣穿仁壽銅良人少使
望春樹百子池前早祠去額畫銷硃點暈重指尖碾玉
當窩處由來摘掃最煩紆惟此當牕好勻注紫水開脣
恍瀉丹紅綿撲粉如飛絮因之瓦甌獨見親珠械寶柙
皆非倫履箱銀鑰擎奴子鈿合金釵付貴嬪誰知世事
頗難測金秋銅仙雨中拆拾得皇孫繡祿錢拋來魏后
細紋尺昭華翠瑄摧井榦道傍團扇遮彌寒庫名宜聖
總散失獨留金盃傳人間承恩當日授佳器前後紛綸

尚能記花箱雖好何代貽知為宣德年間事我來吳會
當歲除東湖水落西流魚姜郎酒後出示我令我抱之
長歎歔黃鐘土釜本反覆幾見桑田變成谷半世紅顏
委道途上陽白髮誰膏沐箱空脂盡粉未調當前若個
真娥媯君家陳寶世無算為汝一歌宣德窰

汪主事以藍羅裙子束纖腰畫卷索題

紅羅衫子身材窄裏得長裙楚絲織麴末飛為海上塵
蔚藍染就春潮色闌邊楊柳空拂衣手中紈扇釵頭璣

請看雙帶迴環處長抱纖纖知不知

錢編修所藏司馬相如玉印歌

漢庭司馬梁園客早歲為郎晚馳驛因慕邯鄲舊相賢
借取高名註屬籍當時原有摹璽書大者礮石小琢玕
螭首龜膊總啣帶碧文綠籀皆施朱相傳解玉刻小記
四角中央構名字檄使填將喻蜀文酒徒印作當壚契
于今相隔年又年不虞此物留人間土衣苔繡半斑駁
銀鈎玉筯還新鮮截肪徑寸覆玦紐何必黃金大如斗

錢郎得此真罕希每與秘書通繫肘會當

天子好古文相如已是同時人尚書給札令繕賦落筆
殿前如有神遂登著作入金馬名在何須更相假對策
姑今董仲先容才久為廉頗下長安秋盡寒欲來驅車
一上昭王臺酒間出示爭把翫令我懷古生徘徊前人
意氣不長在况復微文等光怪何物雲英護此符歷劫
千秋不曾壞龍門遺冊嬾未收圖書堆梁能生愁我今
欲借文園篆一惹桃花紙上油

雪中陪益都相公請沐善果寺即事奉和原韻
長安佛寺稱最麗洛下伽藍鮮殊異請沐長從丞相游
祇惜香山遠難至上冬十月大飛雪禁苑層層凍雲結
捲幔驚看花絮飄點衣化作細紋纈朔風吹攪勢轉濃
特尋古刹烟嵐重封將塔上千尋荔寒到門前幾樹松
香厨設饌飯尊客啼煞慈鴉日將夕更上毘盧閣上觀
萬里山河一時白晚來頽水甘露盤椒蘭被體能忘寒
何期太子浴堂內竟作春風沂水看我今逝欲埽塵幘

到處追隨傍車轍縱使宵深歸路迷敢道足寒傷馬骨
題袁孝子負母看花圖

東園花發好顏色白髮欲看行不得負母能傳江革心
娛親自竭曾參力春花已落不再攀高堂老去扶來難
只今負手花前子長把斯圖帶泪看

葉主事歸黃州有贈

宮槐初落秋雲飛天街雨來塵漸稀金門待詔苦寥寂
索米欲炊饑復饑黃州進士子高後十載通籍猶躑遲

郎令丞博許就薦高文足句

聖主知誰審司事去取異清河轅固翻令歸長安苦寒
兼苦熱走馬流汗食不肥炎歎退後喘稍定頓覺晨氣
侵絺衣綠楊橋畔有故館雪堂竹樓皆莫幾逝將去此
作請澣後會重與春明期人生出處貴快意出貴急決
處莫疑何為鬱鬱守冰坎天寒日暮空嗟咨

時呼翰林
為一條冰

云故

題方田伯躬耕養母圖

先生把筆如把鉏
擷芻負米行江湖
偶因嚙指得心痛
幡然歸去南山廬
春田過雨綠初漲
隴上炊烟喜相饌
叔豆應披王霸衣
耘瓜尚荷曾參杖
高堂白髮負日暄
江魚水苻堪承歡
抄書過市當晚讀
綯閣近山防早寒
廬江孝行本千古
他日登堂拜賢母
重展斯圖對酒看
莫望南山慙辛苦

相逢篇為李公子作

豪不馳玉勒
馬俊不挾金
彈丸所貴結
交重然諾
久要

不負平生言錦袍燦燦振長袖李子相逢宛如舊肝膽
嘗傾劇孟前聲名不在劉生後當年把臂意氣遙酒酣
同射西陵潮追隨燕客且擊筑歸來吳市還吹簫只今
奔走困前路謝爾清光展雲霧解得吳刀持贈予價值
千金不相顧世人交友只在錢舊游散盡心茫然隴西
公子幸無恙與子共賦相逢篇

題曹石庄滌硯小影

吳中高士曹石庄建安詞賦超劉王脩然植杖坐林麓

尚著秦人舊時服書成欲換道士鵝春池
灩灩環清波
小童持硯濯波去清影滿前如影何

送同年范太史還吳門

秋風颯颯南雁翔昭文才子還全昌
橫門一道軟塵發
令我黯然懷故鄉軒車數隊駐柳下
野祠設幙留供張
啣盃徐起贈鞭策意氣歷落不可當
華廳分草登左榻
山池賜羨出上方况握竹管記前事
高踞柱下稱三長
其如溫飽非所志曼倩日餓東郭僵
亦知史局本異量

兼荷制舉羅非常
璽書曾答太子令
侯相爭道申屠剛
縱令种邵使覆對
猶拔仙室冠望郎
而乃掉轡古薊野
從此覓路秦餘杭
我家東浙鮮剡宅
回憶北山空草堂
他時得返越州去
為汝一停吳市傍
花飛渡口遇慧曉
草深墓下尋真娘
買隣縱未近樂圃
訪友定能通野航
朝霞幾縷開上谷
流水百道傾高梁
故人分手自茲別
繫馬欲行看綠楊

書馮二世兄學正卷子

稽葵結葉蔓河渚曉露啣衣當秋雨為予欲取茂陵人
同看城南賣薪女長林嘶去駟馬嬌百金裝出珊瑚梢
揮來代作定情物相門之子真賢豪明將入學教國子
年少能傳四門史昭遠從來善解經公超所至應成市
予方就飲學戴崇閒游重覓山桃紅不疑老作金門客
仍在成都酒肆中

翁司馬之任黃州以詩留別有贈

橫江館前江水清臨臯亭畔春花生黃州司馬甫到郡

八縣一州官吏迎都亭飲餞策去騎爭羨當塗好騏驎
人如仲舉入官時郡是東坡舊游地天涯邂逅意氣真
相看本是同鄉人多君惜別留賦詠愧我出游忘隱淪
昨聞巴水大破賊萬里江流盪胸臆倘能汎艇過黃州
便可相期在赤壁

詔觀西洋國所進獅子因獲遍閱虎圈諸獸敬
製長句紀事和高陽相公

古皇慎德開四譯內被綏侯外蠻貊貢物區為王會文

共球載在賓庭冊河鏐畎翟獻上方兜離傑休陳明堂
三靈既應百神洽般般之獸皆翱翔康熙戊午十七載
神武聲名播遙海五時從教白澤來千門真見黃龍采
鴉翎習習負矢飛鷄斯之乘歸林支諸方執贄儼相列
東漸溟渤流沙西于中有國名古里曾渡瀾滄作海市
魚眼看波射水紅鮫絲織浪翻雲紫地當申未產獸雄
金精傑出毛羣中銜絳飾組獻

天子裁貝作章辭禮恭從容檻致射熊館不為珍禽為

懷遠虎落時看接上林鷹房秋到移南苑廷臣侍從欲
賦詩

皇恩有詔徐觀之圓目昂鼻有筋力懸星掣電無雄雌
獨憐彫髮未卷曲曳尾絀絀若散絲衣被欲成鞠色見
牙齧不使鉤形施爾時羣檻桺諸獸木壘槍樊列前圍
熊羆避路不用當虎豹攀欄有時吼青鸞赤雀相對栖
豪豬野馬爭游嬉張昭見此不動色朱亥在傍何所思
聞之有熊狩場谷獲得狡狴比牛畜漢時安息亦獻斯

形似麒麟但無角從茲郊祀播樂章射鳥格鹿非尋常
鏡吹已陳朱鷺曲徵歌還及白狼王何如儲峙未完緝
詔遣求賢共來集東堂甫布網羅成西域剛逢旅獒入
招搖乍啓禁籞開白麟有對皆奇才請看太保卷阿賦
恍見文王靈囿來

朱運副七十

南陽朱季絕凡俗曾破黃巾苑河曲車第題來錦字紅
商船載去滄波綠居平忼愾能任天但行直道歸林泉

洛陽若有耆英會誰謂張燾非少年

玉璫篇為黃母作

鹿門先生好讀書百年之範圍中居手披文史衣佩琚
穿針不纈雙蜘蛛當年太僕扣闔閭夕陽亭下悲歎歔
黃瓊終為黨錮誅曾贊夫子呼階除迄今講學河汾廬
練裳木屐相巨儒席門猶過王公車餅有美酒盃有魚
時當初度獻玉璫攬之日月同居諸庭前又見丹花舒

醜雞篇贈藍連

閩江豪士藍公漪白晝踞牀銜酒卮有時裸袒抱銀甕
翻糟蹋滓眠清醕人生慷慨貴行樂百歲促剗能幾時
不見東隣有王者罔誕擬作劉安辭西家小侯亦何用
拔山驅土填海涯以茲感激俱作達日事鋪漱唯恐遲
長恨書簾非釀具欲使畫簾當麪衣良朋總在履道里
妙地絕勝高陽池醉來倚壁且塗墨興發對人長賦詩
一花兩葉倍精爽千言萬字皆離披高堂名父過八十
口能啖肉手不蒸閉戶尚作擘窠字小如畚簸大若箕

承罌捧缶作甘旨花前月下恒娛嬉子父相對指白薄
八斗一石何足奇顧視越客忽大笑甕傍那得來醢鷄

山中再宿

小溪浙浙覆草裏大溪灑灑長松間高岩雨聲到松葉
一夜冷徹桐君山山中寂歷無近遠再宿始知路深淺
瀟瀟衣露若散絲松牆日出歸來時

中秋後風雨連日蒙馮老夫子賦苦雨吟見懷

依韻和答

毛錐處囊不立見空道南金與東箭日上師門苦未通
况復相違比牆面憶昨三五侍帷幄酒花燭樹紛厯亂
那知月沒駿韃生豐隆屏翳起鬪戰衢巷水大車馬沒
檐溜衝階有泥濺連朝瀝漉喜甞霽尚有絲雨似襪線
安得東海天鷄鳴攜我飛騰到日觀秋高雲隙收斷虹
風急崑前送歸雁忽讀夫子苦雨吟令我口齒重漱盥
情親恍續謝客愁調警似聞楚女散晴雨燥濕亦恒事
讀書所貴在合變只慚才劣和轉難不及劉楨賦公燕

奉贈李公子鄉舉入試長句

海上五梳鳥三日生絳毛鷄斯有良駒踴地騰雲霄廬
江才子擅宿慧數歲能通秘書字人世驚看豹彩光兒時
不好鳴車戲雙瞳皎皎鸞鳳姿清神宛濯秋河湄攀楹早
著鷗鳥賦對客自吟梔子詩行年十五舉進士獨對春秋
解微義擢科不藉賈童名上殿竟隨揚億試黃紋袍子短稱身
紫駟騎作紅麒麟君家奕葉掌詞翰玉堂仙李嬌青春從今直上
紫霄去萬里風雲起前路欲問慈恩誰少年但看春官乞詩處

又和益都夫子雪中游园口號原韻

雪飛滿園夜若繡誰云夜雪不到晝况有季彥後來秀
追陪几杖四座春招携總是平臺人抽牘授簡真良辰
冰凌結花不即謝入林恍坐萬花下祇訝入夕花未夜
斜陽陡射雲隙開傍檐烏雀啾啾來坐花肯向花間回
奉和益都夫子雪中游祝氏園林原韻

三輪出游忝陪從燕山一夜雪成凍遙尋古寺塔樹深
近見平林酒旗動孰期名苑環木坪幾曲層軒繞松棟

欄邊花竹娛晚晴盤內蔬蒲擷午供寒鳥偏教谷外啼
冰凌故作枝頭弄酒傾百杓輸阮宣裘敝多年過平仲
墮地陽烏欲射難有月如弦那能控

戴公子生兒適大理君遷京兆信至

秋風瑟瑟玉露滋庭前桂樹生新枝朱欄噪去烏鵲侶
錦堂抱出麒麟兒執手命蘭已擇日探丸拜麻當此時
筵開湯餅雜三雅滿座朱衣正瀟灑有客能傳京兆書
阿翁已走章臺馬男兒個儻似長文儼然頭角生風雲

當筵况有清都信不試啼聲便識君

過宗藩輔國將軍邸第留飯兼蒙賜詩賦謝長

句

擁彗不入齊相門挾刺不謁長史宅紛紛花柳看滿城
那有停車道相識掖門東去蘭坂長五王舊第環宮牆
平臺遠屬諸國邸複道自連興慶坊瑤林玉樹蔽階祀
帝室名駒總千里講易能踰沛獻賢好詩不減元王裔
風流大雅真絕羣愛予曾誦予為文


每稱予詩
文皆成誦

相逢倒

展宛如舊入座縱談驚未聞金杠壁帶掛珠幔日射牕
螺恍流電百軸牙籤夾畫欄一庭花影翻書案繁肴錯
核難具陳紅肌紫翼青絲鱗湖筍盈枰如切玉山梁作
飯似傾銀逡巡授簡發毫素示我新篇出雲霧麗句曾
開瑪瑙屏清音漸啓金笳路長吟短詠皆有情黃塵罷
舞鴛停聲西園徒厠賓客履梁苑竟慚枚馬名御溝春
水晚鳴咽暝色重重暗林樾惟恐漁舟難再尋坐對桃
花不能別

夜飲梁尚書宅有贈

宣平門前吹朔風大車小車如轉蓬
縵冠挾刺向何所為謁鉅鹿司農公
司農文賦早名世高起龍門似司隸
七序傳為梁氏詞一臺寫出尚書字
藝林雄視四十年走趨幕下多豪賢
愛才不減天倉粟列屋曾無月獻錢
見予倒屣設餐飯竹席蓬屏坐來晚
燈前分牘避逡巡酒後高談驚近遠
山茶發紅滿牆夜看賜劍皆文章
司元本是中樞宿欲返天街一望長



西河集卷一百六十三

欽定四庫全書

集部

西河集卷一百六十五

詳校官編修臣曹城

助教臣常循覆勘

總校官庶吉士臣倉聖脉

校對官編修臣沈清藻

謄錄監生臣劉書

欽定四庫全書

西河集卷一百六十四

翰林院檢討毛奇齡撰

七言古詩

戲贈徐曼倩畫扇

徐生妙筆似魏華又似趙昌能畫花東家嬌女白團扇
乞畫牆東落花片紛紛蛺蝶趁滿林我亦見之生愁心
故人有子得如此何用滿籬純是金

紫庭篇奉贈張庶子史館總裁初度

自昔至人生有為河游龍蔡山出雲紫庭五象不恒見
含華苞德離人羣清河夫子本峻闕戶排三戟門十輪
况揚世德誦芬烈絲綸入掌推金昆櫝傳烏策結碑版
字譯馬馱增典墳館草詳略總新意庭花燦爛皆奇文
伊予薄學恥操瑟外郡不知枉薦纁入都挾刺但局促
登堂納履爭紛綸盈枰飯落塵尾屑列鼎氣函搗膳煮
微言要旨均有會窮蒐極檢真難聞恭逢

天子重文學議修前史藉討論首推東觀作楷棧如平
有準直有紋又如杞梓任裁割一一得施大匠斤憶昔
浙省論鄉秀曾發策問如所云明史諸按互得失對者
不若問者神爾時予以避人去恨未考辨似向歆今膺
編纂得主者宛然弟子師河汾長羸既至邁皇覽天門
日出烈若焚張星儼在翼軫列公子時見倉琅根但識
四矢冒綵箠那知三鳥拖青裙江左舊族本最重淮南
有文當自尊千秋得志苟長在世安用徒紛紛

贈王舍人赴常州幕

去年同詣公車門有司藉藉推公孫雄文博藻騁偉辯
開牘殿前驚

至尊須臾授職令著作不及郎官並丞博獨憐垂老軼
清河但入中書詠紅藥天街對酒冬復春高梁柳色侵
衣新師門相倚頓分袂令我黯然傷遠神蘭陵酒熟野
花發此去江南好時節那堪羸馬夜歸來空望金臺一
輪月買田陽羨心自閒莫嫌蓮幕春風寒他時憶我新

詩好應在荆溪水榭間

奉和崑山葉掌院夫子題翰林院壁用東坡清

虛堂韻

翰林院前堆北沙翰林院裏通南衙填廳衆制但分草
列館一區長種花崑山夫子秉文府授易遠探七十家
日繙縹冊傍銅鶴幔掣鈴索驅饒鴉敕令掌筆定前史
美刺不雜萎與葩祗慚諸子濫藉氏昫紕收穢煩鉤爬
從來道潤鮮塵渴菊苗蘆菹不換茶况傳五教警聾聵

隻手肯卸懸田過秋風院落久積塌驟見補葺翻嘆嗟

時新修院成

學人績學有如是請看壁上揮丹霞

輓歌詞送盛廣文櫬旒還里

君不見見潁川陳仲弓公卿會弔線麻同
又不見南州徐孺子獨抱生芻走千里
由拳夫子學術明早年兄弟同
成名漢家應辟推楊震秦代通經重伏生
偶然曳杖歌延佇遂賦雄文玉樓去
堂上鱸魚躍未能墓傍大鳥歸
何處生平感慨不得誚空吟華屋還西州
天寒執紼錢

塘路滿目江濤涕泗流

金匱仙人歌贈陳子太士

有序

陳子太士與予共文會者將二十年曾登選樓甲乙
諸試帖墨義雜文示天下天下人爭奉為金科玉律
疆估籍之起市門利既而撫去得葛洪金匱術遨遊
長安予被薦就試試之前三日右手病痺而潰于熨
腕脹如長瓠五指僵蝨告吏部不聽告監臨掌院不
聽隔試一日將夕矣遇太士于途驚曰何不早示我

令至此急市藥二升許灌之令濯自溫至涼再灌之
指漸有文至漏一下又灌之漸斂次日赴試

泰和殿腕仍發痛如艾焙暗下而指詘可書因勉書完
卷出出則病亦減是雖天固厄之然太士醫療之神
何可沫也踰月予從諸君後蒙

聖鑒取中且用古制科例授館職因感太士術作金匱
仙人歌謝之詞頗不叙致其意

昔者葛洪得神術著書金匱稱仙人千載以後鮮繼起

肘後有方空復陳潁川才子擅文藝
月旦時賢等操契海內皆知伯玉名
樓頭只許元龍憇學深二酉通九淵
夢隨鴻術游鈞天長桑與客意氣合
種橘啖人淮海間天街二月花正發
忝詣公車向高闕斷手徒令拙匠嗤
寸心久為貧交竭時當

名試入玉除大官將賜蓬池魚

九重前箸欲借挾一時左手難空書
公乘交臂頓有省迎鳳坊邊酒初醒
煮藥惟燒王質薪澣肌不用蘓耽井

深慚手指重五斤非時能詘還能伸多君九折作良宰
惠我一劑真有神上醫醫國本恒理况有高文比秋水
他時金匱獻書成當復逢君杏花裏

送吳明府超遷觀察之閩

溟魚十歲不掉鬣一掉直上天門間從來神物有異量
豈與世數同往還夫君百里本寄跡要使殊才破庸格
司隸何妨拜茂陵通侯久已稱褒德一朝治行天下聞
果然第一推番君聲名特達播閭闔頓令平地生風雲

丈夫入世貴，個儻攪轡登車氣。何爽望去雙旌擁，轆輪
行來八察加。廉訪東風二月度，七閩溪花海樹郎官春。
嚴生自足開甌越，何必平津解笑人。

慰尤司法喪婦作

秦嘉垂老上計車，閨中無復紅羅襦。長卿獻賦不歸去，
那得有婦留空居。玃玃白兔走且顧，南北東西隔長路。
挽鹿難追司隸驄，隨鴻先傍要離墓。金刀劃水斷不成，
悼亡賦罷顛毛生。從人但道婉婉節，使我頓增伉儷情。

當年司法北平右共識使君自有婦今來被

名入

帝京不道寒房夜炊白桃林闌前桃樹新東風吹作樂
河春相尋倘認盧龍路應遇金臺夢裡人

項學士招沐益都相公萬柳園同諸公即席

朝上金商門暮宿永寧里翠帔結烏頭黃塵障驢耳同
鄉先達項橐師鬼鬼副相居黃扉見予落托頗矜惜往
往引手相扶持連朝待漏趣入侍看倚

金鑿判封事御餽盤分錦菜羹宮衣袖惹硃花宇旋從
請沐呼飲間便尋杜曲城南端紅泉舊有昇平宅綠野
新開裴令園長樊介隴辟廣畝種得垂垂萬株柳九列
頻教汁染衣三眠不用枝生肘青絲碧縷布作帷今來
正值東風吹珠軒玉勒請載過名賢豪客紛追隨紅橋
初度入澗曲木末空亭接林隩平原漫衍馬埒長旄澤
蒲移覆朱屋霜推雪壓葉漸疎猶然鬱鬱園中居官渡
城邊朝繫馬永豐坊裏夜藏烏藏烏繫馬兩不見短榦

長條拂人面，蓊蔕難分。灞上營風流，那減靈和殿。間堂
四座傾，酒卮行厨炙。鹿還烹，蠡庾公撤。幔欲理，詠潘岳
隔筵將賦詩。寒飈襲袂日，馭短重向枝。頭覓覓，睨澤在
何愁。玉醴枯情深，頓覺霜裘暖。先生意氣豪，且真相從
彷彿游雲津。他時得返柴桑去，望爾還尋柳下人。

冬日過上海署故人任明府製衣衣我感賦

丈夫生豈易衣食，終年在道披練裳。朔風吹林下寒葉，
垂老欲住江湖傍。故人為宰在滬上，呼我再過聽絙桑。

薛城留客有布被萊蕪滌釜無春糧顧此短褐不至飢
惻然為念范叔僵自視兩袖頗飄薄但看七尺真昂藏
割氈何足贈江革解襦不敢衣顧郎冰絲急付凍女剪
鈿尺便向當身量生平旅食就仁祖前歲婦禪辭豫章
惟此繭為伯夷種况逢衣自膠東牀貧士被服允無斃
良友致意安可忘只憐連衽坐相對反于官服加輝煌
少小誦讀并不出嘗恐行路分左羊十年衣褐蔽廣柳
一雙葛履投嚴霜多君力學早通籍脫麻更著宮錦黃

今來為吏解衣我宛如當日東書堂陽和乍轉稍暄煖
我當刺擢還故鄉入林服此快游飲落花滿袖春風香

答贈湯右曾長句

嵯峨閭闔平旦開馬蹄撲撲飛黃埃湯生年少好容髮
與之相遇長安街雙瞳炯炯負意氣手挾干將甫磨礪
鉅器知為王儉才請纓未遂終軍志他鄉各恨相見遲
贈予長句如哀絲酒徒慷慨和未已令我聽之心骨悲
從來知己老彌寡擊鐘無聲且擊瓦感君任俠過季心

空道微文似司馬宜秋門前霜葉黃解衣但醉當壚傍
吳姬十五正年少新滴玉槽蘭水香

孫侍讀初補學士復將還養于其生日歌以贈
之

射州學士孫叔然早年草詔蓬池邊乞歸養父三十載
登朝綠髮方鮮妍山池宴罷出就舍二月含桃摘盈把
倚案羞裁五色書當街且控三花馬綵弧初絰還養鄉
鬱洲山色仍相望臨行欲致留君意郢水坊南酒正黃

寄黃州向君

予修史時錄史監
生向在江之父也

石陽城西江岸春龍丘高士方山中讀書蘭浦水長碧
把酒雪堂花似銀金門獻策路中斷綠髮紅顏有時換
華頂難同禽慶遊柳邊且共松生鍛趨庭皦皦白玉姿
燕臺石鼓來題詩文章久為成均重筆札新從翰苑知
園冬史館每入直輒向芸牕見顏色因道家公舊有心
能使羣賢遠相憶楚江東下繞臨臯赤壁于今戰未消
誰解此中間歲月有人家住綠楊橋

送趙郎中推使揚州

曩者始元舉文學盈廷辯難惟推商茂陵魯國各持說
但欲措拄桑弘羊今來待詔給筆札方值征輸事過伐
大夫文學相見踈誰敢著書論鹽鐵司庾覆錦稱望郎
懷香握草趨明光延清詞賦韋氏學二妙有誰能抵當
星軺奉使擁邗上畫舫紅橋截春漲豹尾朝懸估客嗔
鬪鳴夜度官艚餉揚州此去風景殊繞朝不用攀行車
關門紫氣時時見為我重詮道德書

題暢心閣冊子

王二光
祿別業

王生本是烏衣郎家藏司馬金翦章草堂開向衆山裏
高閣下臨湖水傍春雲出軫入帷幔朝雨盈塘接南岬
檻外長町裂芡衣門前漲水浮花片沿湖東上一堤遙
跨向湖心有畫橋啞啞波間翻雁鷺參差沙面長蘭茗
種來隔浦荷千頃看去當風柳萬條晴光繞樹鳥雀噪
縛得芒針好垂釣載酒嘗過阮緒家到門總是王猷棹
談經抽牘并論文山根紫筍方穿雲鬪還烹就雜茶芽

玉帶有泉天下聞相傳此地即蘭渚上已曾經集王許
千秋尚憶禊賓年三月定傾留客雨今來同作京國臣
高梁屢見桃花春敝衣但濯龍池水解帶難揮馬棧塵
夢中攀得鄉井樹欲賜官湖乞歸去狂客新祠久未成
務觀舊宅知何處十年奔走無宦情相期空負南山耕
多君猶有逍遙館每欲題詩三嘆生

蒙內府席學士高軒見過隨于報謁時留飲感

賦三十五韻

帝城春暖柳漸舒烏裘百結懸柴車王門何處堪曳裾
徒然懷刺隨屠沽北宮才子金馬廬曾披錦字紅綾書
從龍起自豐沛墟虛懷善下愛腐儒春行漸訪干木閭
自慚十載沉江湖浪隨嚴助思上書惟恐操瑟非所須
欲行還住多趙趙到門挾帚但埽除俯首不敢繫履約
何期門吏禁走趨居然倒屣迎王符鼇扉宛轉闢綺疏
邀予並坐紅氍毹清談揮麈間有餘腰間尚掛雙玉魚
御河流水烹滿壺攢盤苑核兼山蔬楚苗之食隴阪蘓

間寫馬酪傾乳酥宛如水底蟠珊瑚酒間誦我文未踈
葛莛曾採東園株鸞鳳五色狎野雛從來薦達稱子虛
枉稱予賦同不如方今築館招燕都千里共披駿馬圖
丈夫知己無處無醉醒何必懷菰蘆

送趙棠溪歸西江

棠溪趙子真天才千里馳騁如龍媒曾因借箸宰吾邑
滿城萬戶皆嬰孩今來相遇薊州路早向長門賣詞賦
黃塵撲面風捲衣蘸墨揮毫有神助春光初動柳拂波

故園花發思如何掛帆通潞欲歸去酒徒市上還悲歌
天涯去住總為客請飲杯中壯行色此去無愁良會孤
前路何人不相識

益都師相請名同館生西堂燕集用陳檢討即

席原韻命和

從來珠履羨黃歇好客高風久淪沒但道公卿善下人
有誰肯結王孫襪况子落托久不前那得簸揚似糠麩
何期夫子亟引手不使出官請六蝎坐令蓬蘽偃樓人

頓入玉堂造金闕季秋望日日將卒諸生講論燭未跋
寔開絳帳通酒漿恍為戴崇設肴核炙肉分脔入豆新
霜葵軟齒嫌匙滑當筵酌斗如挽河那顧中宵有星孛
須臾銀箭落如雨帝閤已閉絕鬼謁第恣雄談未肯降
轉使深盃不停罰我今納履將欲發世事紛紛慢相訐
人生好會能幾時日月東西嘆倏忽不見貧兒甫釋褐
便得登壇仗旄鉞何須把定三寸豪只賦天心與月窟
朝來爽氣滿西山吾且支頤拄牙笏

西堂讌畢仍用前韻擬宮怨詩益都師相詩先

成命予援筆立和其後

長信宮中秋雨歇昭陽殿裏星初沒秦女朝來未卷衣
班姬夜久將弛襪憶陪阿母學針線頗厭小郎食糠粃
第向釵頭綴玉蟲幾曾臂上填朱蠋誰知一旦選良家
遽綈黃羅赴天闕才人下比廝養卒永巷隨行覆足跋
每開溫樹使探花但食金桃便藏核我今欲織龍袞裳
桑壇浴繭如脂滑祇恐綠成五色絲朱紫青黃變為字

古來九嬪掌婦儀不使三宮盛女謁同車宜謝壁門行
退養甘蒙掖庭罰况當邢尹甫見憐豈有昭儀敢相訐
春花秋月如等閒暮雨朝雲總翕忽菲服華袿拜屬茵
何須繡黼提章鉞莫道飛蛾善築牆莫言狡兔能營窟
官家如點上陽人恐有佳名再書笏

膠東道中寄周生六十初度

拒霜花發紅滿枝畫屏金鳳雙差池汝南高士遘花甲
弧矢在囊酒在卮迴思夙昔擅聞望藝苑鷄壇屹相向

第五名垂驟騎間中郎文在司徒上閉門高卧三十年
東堂有弟留花甄潯陽自負達人譽洛下共稱之子賢
與予意氣頗相得論議當前快冰釋菜蕨猶存澹泊心
矍矍不費推移力

周生每談
名理故云

自憐歲暮淮海行馬前挹

水長清清只因早向膠東路時見長庚徹夜明

宛平相公初度奉贈七月八日

往者

開國主文教前有宗伯後七兵燕許一時得父子袁楊

數世皆門生伊余被

詔待官邸親謁尚書集賢里堂供

先皇舊賜書園通後夜新添水春雲繞屋花繞牀豈期
絲竹還東庄翟公在籍甫終制曹相就家趨辦裝槐廳
入坐署堂押百職班迎敢相躡鼎耳環看總赤文詞頭
待判加黃帖自來策拜重報昨况復新參本名輔題冊
重思

母后恩探符特赴

陵園路三年橐筆為史官私書不敢投任安感公冰鑑
炯相照使我墨花寒未乾始知元宰受帝稟手摘星辰
類菽菘不信試看河漢間昨夜天孫布雲錦

西河集卷一百六十四